

111 年全國語文競賽客家語朗讀文章高中學生組（詔安腔）

編號 1 號

【暗頭个海脣】彭瑞珠原作

暗頭个海脣，無麼个人，天嶮个月，驚見笑个藏在雲後背；拘禮个海風，驚生份个吹一臨又恬一臨，出海口个海湧，慢慢仔在遐激啊激个¹。無人出入个魚市場內底，即單單留幾下葩²孤單个電火，啊擱，幾下臺推啊推³个抽風機。

魚市場外頭這片闊闊个停車場，歇無幾多臺自用車，猶無想討睡个駛車个人，有人隨罐頭來供流浪狗、嘛有人隨釣竿來召月娘釣魚。魚市場遐裡遠遠个停車場邊脣，幾下个越暗越有元氣个少年人，載著掛大喇叭个音響，拗車後斗翹向天、三臺車排排企，在遐咚滋咚滋⁴尋月娘共下跳舞。

正手裡个音樂聲撓到个脚底癢癢，毋過，俾手裡騎過个兩臺奧多拜，錫著个目光。个踈个身影，行上兩百八十公尺長个笨鯊橋，想討去睺望，掛頭燈个兩個網魚人，係討網麼个魚？月娘嘛探頭出來啊，一浪一浪个水紋，在月光下睺到清清楚楚

楚，一張魚網、兩個網魚人，拋網、收網，撈起來个係一網个月光。雖然，連魚屎都無，毋過，佢人猶係有講有笑，个想，佢人驚係為著討答嘴鼓來个，網魚，單單係兩同年想討在月光下共下奈个理由定。

橋下个溪水，嘛認个个想法「係啊，係啊！」越應越大聲，个越聽越心色。毋過，拗佢睺真來，遐「係啊，係啊！」个聲說，驚係溪水得海湧打轉來，抑係海湧激上溪水个聲啊！

不知不覺，即得个行過笨鯊橋啊。橋這裡，日時頭得人箭到足緊个鐵馬，這滿歸下一列列企好、企正，在月光下恬靜。光熒熒个路燈下，無人來去啊，單單一隻揸著螺殼个老蟹，對白沙墩探頭出來又藏倒轉去，對路脣越過來又越倒轉去，自家在月光下賞藏膨嬰。个企在路脣，睺老蟹、睺流流流个溪水，在共样个月光下，若像得个睺著啊，成過，遐歸大陣笨鯊入港个時，客家捉漁人佢人面上个笑容。

¹ 激啊激个：音 geb` a` geb` e`；液體來回晃動貌。

² 幾下葩：音 gia pa`；幾盞。

³ 推啊推：音 kog` a` kog`；此為形容機器轉動的聲音和狀態。

⁴ 咚滋咚滋：音 dung` zii dung` zii；形容電子音樂的節奏聲。

111 年全國語文競賽客家語朗讀文章高中學生組（詔安腔）

編號 2 號

【夜鷹】邱一帆原作

添放對哪時開始，佢輒輒在暗頭，聽著天嶼「追佢啊追佢，追佢啊追佢」个聲，一聲又一聲，一直對半夜喊到天光，遐注死耳鼻吵人个喊聲，正會對佢个耳空底消失。真多年前，佢第一擺在屋下聽著遐恁尖恁利个聲，實在拄毋會核，撥工行到屋前去睭。遐烏烏像細隻雞么个身影，在天嶼飛啊飛、覘啊覘。有時，毋知係飛恁啊，抑係麼个，會恬腳歇在屋嶼，灰紅色个臉身，「追佢啊追佢，追佢啊追佢」个聲，猶係一聲喊過又一聲。

遐係麼个鳥？聲哨仰子會恁吵人？佢攔緊走轉屋下去，真認真上網路去尋資料，尋來尋去，正發現遐種形个鳥，名即喊做夜鷹。想起來感覺真怪奇！早早在 1861 年即有人在臺南發現佢个影跡，離這滿有一百五、六十年啊，已經算係臺灣特有亞種个鳥，對山嶼到平洋、對莊下到都市，滿哪位都睭會著佢个身影、聽會著佢个喊聲。仰子佢食到四十外歲，正第一擺在南庄聽著、注意著按个鳥聲、知按个鳥名咧？佢感覺自家真否勢啊！否勢自家無好好認識，一直生活在自家身脣个鳥。

逐年新曆二月到八月，係臺灣夜鷹尋伴个繁殖期。七個月恁

長个時間，逐隻鳥公攏想討尋著自家理想个對象——鳥嫲，互相培養感情，相好下一代。嘛一直愛等到孵生後代，細隻鳥會飛、離開鳥公鳥嫲个保護，正算完成傳宗接代个使命。所以，在這站時間，鳥公對入夜到天光，會直直喊出「追佢啊追佢，追佢啊追佢」這吵死人个聲骸，來宣示領域，嚇走別隻可能个入侵者。嘛因為夜鷹个聲哨否聽又大聲，有真多愛恬靜驚吵个人，即按得夜鷹吵到毋會睡，氣到望毋得夜鷹較緊消失去！

佢知夜鷹个聲哨真吵，吵到人毋得食睡，尋伴个繁殖期間，確實影響著大家个生活。毋過，夜鷹毋係無一埕好¹，佢對環境嘛有一定个平衡²作用。夜鷹个嘴擘到又闊又利，會用來搶食蟲，毋管係在暗暗个天嶼抑係光光个路燈下，水蟻、金姑、草蜢猶有真多蟲，攏係佢个食物、佢个好味素。因為夜鷹个捕食習慣，多多少少嘛維持遐兜蟲个數量，保護著生態个平衡。

¹ 無一埕好：音 mo` rhid` deu` hoo`；一無是處。

² 平衡：音 pin` fen`；指一個物體的運動維持不變（亦即沒有加速或減速）的狀態。

111 年全國語文競賽客家語朗讀文章高中學生組（詔安腔）

編號 3 號

【芋卵葉个智慧】謝錦綉原作

這幾下年不時會在報紙、電視新聞睇著，魚个食肚底有各種塑膠袋。

現時因為塑膠袋便宜又利便，毋管燒个、冷个、冰个，歸下用塑膠袋來裝，無論上山落海，大隻細隻，用過即擊莫，大家慣勢按無限制个用塑膠袋。

三不二時睇著新聞報導，海鯪死在海脣，研究人員切開食肚，發現海鯪毋係破病死个，係因為食忒多人類擊到海底个塑膠袋，無法度消化正死去。海鯪歸身有塑膠粒个毒性，猶个海魚嘛共樣有；人又捉魚來食，這毒性又轉來到人類本身。結果即按輪迴，魚源頭減少，大環境污染，人類係大食物鏈其中之一，康健當然嘛會影響著。

今年過年了，佢對嘉義起來臺北寮一兩個月；佢姊躡新店山嶼，有所在好種菜，逐擺有菜好捋，佢即坐車提來得佢。

第一擺提著佢用紙絡裝个青菜，佢先囿入冰箱，等到討煮个時，打開紙絡一睇，啊哦！正知紙絡內底擱用三層芋卵葉包个，毋係用塑膠袋包躡。佢想：「阿姊，你正經躡毋會著時代啊？這

滿猶有麼儕用芋卵葉包物件咧？」佢暗暗在遐笑阿姊。

無想著，先提一種菜來食，旨食个菜照原本个芋卵葉包轉去，擱囿轉冰箱。過兩日菜食淨，去提第二種菜个時，打開芋卵葉，包在葉底个青菜，猶原在萋萋；到這下，佢正知芋卵葉恁好用。

這滿个時代，科技進步真緊，大部分人總係認為新个發明較進步，舊換新，舊个物件大家即擊莫。

毋過，毋管新抑舊，大家總愛想較長、想較遠兜，遐兜毋會綿、毋會歿个垃圾，越留越多，留到盡尾，地球總會得垃圾措莫；到遐時，人類無法度躡地球，後代子孫嘛毋知愛躡去哪位正好？

芋卵葉毋單會用保存青菜、魚、肉，比塑膠袋个效果較好。物件食了，拗芋卵葉擊莫，佢轉到泥底，自然綿去，即變做肥料養分，做一下攏無打爽。芋卵葉無毒性，毋會污染環境，顛倒得地球淨俐，得人類康健，這係成過人个智慧，愛記得正好。

111 年全國語文競賽客家語朗讀文章高中學生組（詔安腔）

編號 4 號

【老鼠】張捷明原作

老鼠有真多種：田老鼠、透地鼠¹、錢鼠、大老鼠、細老鼠……，田老鼠在田底絡食，真愛食番薯，真大隻、又有肉，係成過個人無豬肉好食個時，真重要個肉類來源之一

講著透地鼠，佢蹣在泥下，頭愛打空，蒔田個水田，在收冬畷下種番薯，若係有透地鼠，等到交春蒔田，田脣輒輒會漏水，穩水田²嘎變漏水田。山田個田塍較高，猶會慢慢崩田脣，即係老儕事講個：「大漏漏毋長，細漏漏燥塘。」意思係講，山魚塘若係有老鼠空，大空漏大水，會緊張，攔仰子無閒，嘛會撥工去塞起來。毋過，細空漏細水，無閒個作穡人即會想，一兜仔定，即無恁要緊，想講韶日正來補，結果韶日又添放，等到想著，魚塘水早即燥了啊。

田老鼠會打爽³番薯，人即捉老鼠食，算係一報還一報打平過。透地鼠真得人感，毋過，會用得人想著這句老儕事教子孫，嘛算佢猶有一兜仔功勞。

另外，猶有錢鼠，錢鼠實在得人感，蹣在人屋下個圳溝底和烏疏疏个所在，細細隻無幾多兩肉，猶一身臭轟，係現時阿依頭驚个小動物。毋過，大人嘛真心色，偏偏拗佢號做錢鼠，驚係講，這伙灶有錢，穀倉正會有真多穀得錢鼠食，好得人類知好供貓捉老鼠，若無，金山銀山攞會得佢食空。

毋過，這滿天年倒貶，除了田老鼠、透地鼠、錢鼠，攔加一種寵物鼠。寵物鼠無天敵，連貓都毋係佢个對手；今个人供个貓，嘎毋敢捉老鼠，攔較毋敢捉寵物鼠，在人个屋下，一裡供老鼠服侍佢做阿公，一裡又感覺對貓毋得過，所以嘛用飼料供貓做寵物，毋單毋使寵物貓捉老鼠，猶拗老鼠放共下，表示貓鼠世紀大和解，人類第一功。毋過，麼儕會知貓係仰子想个咧？

二十世紀後，除了寵物鼠，世界又加一種新品種个老鼠，毋使飼料，毋會屙屎，淨淨俐俐又毋會亂人，逐日困在手底惜日惜夜，佢喊做滑鼠。手婆捉佢个臉身在桌竦一滑，手指摩一裡耳子點下，即會用指揮電腦，指揮世界，指揮地球，難怪十二生肖，老鼠早即打第一，貓嘎紙頭無名、紙尾無姓，連和老鼠比大細个資格攞無。

¹ 透地鼠：音 mun^ˆ ti chi^ˆ；鑽洞鼠。

² 穩水田：音 bbun^ˆ fi^ˆ teen^ˆ；能良好保持水量的水田。

³ 打爽：音 da^ˆ song^ˆ；破壞、損壞。

111 年全國語文競賽客家語朗讀文章高中學生組（詔安腔）

編號 5 號

【阿媽个八哥】曾菁怡原作

蹠莊下樹多、田多、鳥多，天氣好打早即會用脛著電線面上
俛共下像旨睡醒个鶉鴣，抑係歸陣嘍嘍嘎嘎在路脢絡食个屋簷
鳥，有時猶脛會著在天嶼飛來飛去个鷓婆。有一種鳥歸身毛烏疏
疏，單單在翼胛尾和鳥尾有一兜仔白毛，目珠、嘴和遐瘦夾夾个
腳係黃色个，喊做八哥。佢總係跳啊跳、跳啊跳，不知不覺即渡
偈跳入有偈媽个回憶內底。

阿媽係樸實个莊下夫娘人，溫和恬靜，為著家庭一世人攏像
直直輪个擗無一時閒。天旨光即跋起來焯豬菜得豬食；天甫光即
擔衫褲去溪脢洗；衫褲晾好又攔攔緊去菜園落肥、沃水。除了這
兜，猶愛煮三頓、供頭牲、做田事……。歇晝个時阿媽正有通歇
暍，佢頭愛坐在門口个藤椅面上，目珠眯眯享受微風吹在面个快
活。

有一日歇當晝，阿媽正坐落來準備歇暍，目珠影著外頭个竹
籬下有一鬮烏疏疏个物件在遐停動，行俛去脛，發現係一隻猶毋
會飛个八哥鳥么。阿媽拗佢捉在手底，對頭脛到尾；對尾脛到
腳。一下揆啊揆佢个頭那嶼和面頰卵；一下掀開佢幼嫩个翼胛，

搨過來搨過去，像細子抓著心色个玩具，脛到目珠金金無瞞目。

阿媽想起閒間有一隻成過阿叔供鸚哥个鳥籠，即決定供這隻
鳥么。逐晨早，阿媽手面洗好即去脛籠內底个飼料猶有無？愛攔
添水無？一有閒即拗鳥籠拚到淨俐淨俐。當晝食飽，阿媽攏會拗
藤椅徙到鳥籠脢，俛著籠教八哥講事：「天光啊！」、「食飽
旨？」、「大家好！」、「正來奈」……。一日過一日，八哥脛
著人嘛會講阿媽教佢个事啊。

無想著，有一日晨早鳥籠門毋知仰子得人打開啊，內底个八
哥嘛毋知去哪位？阿媽兩支手捧著飼料，頭頓頓企在鳥籠脢，久
久正接受八哥毋見去个事實，唸啊唸講：「恁打爽，供恁久
啊！」遐隻鳥籠又收入去閒間底園啊。

這個禮拜日阿媽做對年，阿依交代愛轉舊屋祭拜。燒金遐
時，幾下隻八哥在竹頭下跳啊跳、跳啊跳，有時擎頭脛遐脛這，
落尾即飛到竹林內，正伸風吹過竹葉窸窣窸窣个聲。毋知阿媽這
滿有和佢講事个八哥無？

111 年全國語文競賽客家語朗讀文章高中學生組（詔安腔）

編號 6 號

【網出阿依个背影】徐熏嫻原作

網路即像係無邊無脣个大海，網核人和人之間个距離、世界个脈動和日常生活。佢，即像係一尾魚，輒輒洩入網內底賞賞奈奈，越洩越深、越洩越遠……。

猶記得讀國中討開學个前幾下日，阿依提一支手機講討得佢用。起頭下，佢懷疑係毋係耳子有聽毋著，一直揸著手機，佢歡喜到毋會奈，心肝底想總算有一支手機啊！正想討仰子好好來用這手機个時，即聽著阿依講：「得你手機，係得你和屋下人聯絡事情較利便哦！毋係得你提來變鬼變怪个，嘛升國中啊，自家愛知自愛，敢做會到？」佢跔个頭頭講：「阿依安心啦！佢用手机一定會有分寸个。」

續落幾下日過後，手機內底三不二時即跳出遊戲、社交軟體个訊息，「阿依安心啦！佢用手机一定會有分寸。」這句事早即變做一臨風，飛到天嶼遠去啊！

網路世界切斷阿依和佢兩儕个信任，不知不覺和屋下人講事个時間越來越短，和手機作埕个時間越來越長；鬥做屋下事个時間越來越少，洩落手機个時間越來越多，佢即像今這滿个低頭族

共樣，若手機提在手，討放落係無恁快个事情。

記得有一日食過暗頓，佢堵好和同學賞緊張刺激个線上遊戲，阿依喊佢好去洗碗箸啊，佢假影無聽著，過無幾久阿依又攔加喊一擺，佢氣感感應：「大細心！逐擺攞喊佢！屋下正伸佢一儕人哦？」無想著這句事深深刺入阿依个心。阿依聽了後，恬恬仔行入灶下去洗碗。佢睇著阿依洗碗个背影，感覺著頭下對阿依應嘴應鼻¹嶄然過頭，攔緊放落手機拗阿依回失禮，拗阿依手底个碗箸接來洗。

遐暗夜為著這件事睡毋會落眠，頭那底浮出阿依洗碗个背影，遐背影即像一面鏡，照著阿依腰痠背疾个身影，嘛照出佢个無款；照著阿依對佢个歡頭喜面，嘛照出佢對阿依頭撇撇²个面相。更深夜靜，佢个反省比夜猶攔較長，經過這擺个事件，正感覺著佢个日常生活已經得網路世界縹緲，漸漸減少和屋下人个互動。所以，佢想討尋轉阿依對佢个信任，愛自家要求自家正確來使用手機，學校作業一定愛先完成、鬥做屋下事了後正用手机，猶愛記得和屋下人加作埕一兜，大家和和氣氣過日正係頭有溫情个家庭生活。

¹ 應嘴應鼻：音 en^ˆ zhe^ˆ en^ˆ pinn；頂嘴。

² 頭撇撇：音 teu^ˆ pied^ˆ pied^ˆ；形容不予理會的樣子。

【搖顛¹筍蟲】郭亭好原作

細漢個時，爺哀為著討供僱人這陣大細，歸日無閒到玲瓏楚，屋下底長在伸僱人這幾下個細子，逐擺賞到慄啊，毋係伏在長凳面上睡，無即係在門斗下睡到四腳筆直，天生天養，遐係僱識行過個童年。

等阿哥較大漢啊，佢會渡僱人滿田洋去捉蚌蚬、捉草蟻、搵土扒仔、土樣仔這兜來食。遐時，屋背有種一大蕪個烏葉竹，發竹筍即會有筍蛄²來叮筍尾放卵；狡怪個阿哥會渡僱人去捉筍蛄來賞。阿哥捉筍蛄個本等一等慶，佢講愛細義毋好打醒³筍蛄，睭佢輕可輕可一下即拗佢捉落來，得佢睭著個筍蛄無一隻走會去。佢拗捉來個筍蛄用棉線縳核放佢飛，僱人躡筍蛄走，遐線一下長一下短，像放風吹個樣，等僱人賞慄啊正拗線畝莫放佢走。

一擺阿哥嘴豺，渡僱人去尋抽高了正開葉嘎黃去個嫩竹，阿哥講有筍蛄在遐位生卵，內底會有筍蟲⁴好捉；睭阿哥大力搖遐葉

黃去個嫩竹，得佢倒拗落來，正經睭著筍蟲蠕蠕動，僱人較緊跔落去鬥捉。轉到屋下，阿哥即拗這兜筍蟲囵落鑊用油煎，僱人企在灶頭脣頸長長等躡，睭著遐香香赤赤個筍蟲，目金金、口涎水硬硬討汀落來啊！毋過一儕正會用分著幾下尾筍蟲定，佢和阿弟兩三下即囵淨淨啊，阿哥睭著較緊攔拗佢碗底個筍蟲分佢兩儕過願。遐睭子，阿哥恁肯分食，僱人嘎無感念阿哥惜僱人個情意，干若知好顧嘴空，這下想起來對阿哥實在真否勢。

有一日，隔壁個阿姨來得阿依請食當晝，番綻⁵個阿哥知阿姨毋敢食筍蟲，嘎挑持創治佢，拗煎好個筍蟲尖入阿依正煎好個魚肚，阿姨想講係魚卵拚勢食，猶直直安腦講恁好食。落尾阿弟無細義嘎講出來，害阿姨從緊緊入便所貶腹哦哦嘍，遐日阿哥即得阿依扭核耳子去拗阿姨會失禮，攔得阿怙仔罰在公媽牌頭前跪歸下晝。

這滿想起細漢個時，雖然無像現時個人生活恁豐足，毋過日過到真自在，真多遐時好賞個齣頭，一兜仔都毋會輸這滿細子個網路遊戲，僱人在田底山嶼走相捎個腳跡，猶深深印在僱頭那底，係頭心色個回憶。

¹ 搖顛：音 rhioo`zhin`；速度快且用力搖晃的動作。

² 筍蛄：音 sun`gu`；昆蟲名，橢圓形，頭小而口吻特長，如象鼻狀，又稱為「象鼻蟲」。

³ 打醒：音 da`ciang`；驚擾而使其產生警覺性。

⁴ 筍蟲：音 sun`chung`；象鼻蟲的幼蟲。

⁵ 番綻：音 fan`can`；調皮搗蛋的樣子。

111 年全國語文競賽客家語朗讀文章高中學生組（詔安腔）

編號 8 號

【花樹下个童年】李宜諭原作

美濃永安老街在美濃河个上裡，歸條永安路對東門樓到德勝伯公壇，分做上莊、中莊、下莊，偌屋下躡「花樹下」，係前莊，這嘛有南柵門渡船口，係永安老街頭鬧熱个所在。

花樹下深深刻印在偌个童年。偌依民國 49 年嫁來美濃，即在美濃國小教書，猶記得，總會睺佢在運動坪教大會舞、在禮堂教民俗舞，攞有葵扇舞、箸舞、彩帶舞。佢人緣好、手腳溜掠，屋邊个妹子、夫娘人攞會送佢剪伸个布，佢即提來做真靚个衫褲得偌人著，所以，偌人恁多姊妹小學个學生帽、制服、洋裝、裙、褲，大概攞係阿依做个。

偌怙仔嘛係先生，佢真會渡偌人做童物，像：雞毛毬、銅笕仔¹車、竹蟬、竹蚌蛻、竹笕蹬高腳、風吹。遐個年代，歸伙房大家共下用一個便所，便所下腳係屎缸，睺著恁深个屎缸，偌即會頭那暈暈驚栽落去²，所以毋敢入去，阿怙仔即逐晨早載偌人幾下个細子去學校上便所，一個人一間，屙了較緊轉屋下。

猶言入學進前，偌佢阿妹攞係跔阿哥出去奈，去溪脣灌土

狗、賞藏膨嬰；去田釣蛻子；去溪底捉白魚郎；坐在美濃舊橋岫睺溪；在伙房屋內竄上竄落³；去阿媽个溪埔菜園奈；跋過屋邊个圍牆內賞鬼捉人，屋邊氣著即會放狗出來捎偌人，偌人即按練了一身跋牆个工夫。

寒天過了，美濃河猶無麼个水，舊曆二月二伯公生會「做大戲」，係美濃一年一擺做鬧熱个時務，嫁去外位个阿姑、阿姨、姨婆、姑婆攞會轉來永安老街，在親戚屋下躡幾下日，即係討「睺大戏」。在南柵門渡船口个溪脣，會搭真大个戲棚，戲棚下係偌人賞奈个好所在，一兜細子嘛會偷偷仔走去舞臺後背偷睺佢人化妝換衫褲。

開始做戲啊，除了頭前幾下排个老儕人坐在睺以外，猶个人攞係企个睺，有一兜人攞會企在凳頭，細子根本睺毋會著，阿怙仔即會拗偌人擎上肩頭，得偌人睺一下過願，毋過，因為睺毋識嘛聽毋識，阿怙仔即會提幾下角銀得偌人去買食，賣打煙腸、李仔糖、珠仔汽水……个擔，生理一等好。偌阿姑屋下即躡在溪脣，姑婆、姨婆佢阿媽攞會坐在阿姑屋下後背，討落去溪底个樓梯睺戲，偌想，佢人應當攞係用聽个！「睺鬧熱」順續嘛共下「答嘴鼓」。

即按，一日過一日，一年過一年，大人無閒挾掣在過日，細子歡喜賞奈慢慢大。

¹ 銅笕仔：音 tung` gong` a`；鐵罐的統稱。

² 栽落去：音 zai` loo kui`；栽下去、掉下去。

³ 竄上竄落：音 con` shong` con` loo；穿來穿去。

111 年全國語文競賽客家語朗讀文章高中學生組（詔安腔）

編號 9 號

【擎重仙女】蔡承軒原作

阿美生到嶄然靚，親像仙女下凡。

厥怙仔頭驚阿美在路堵著否人，即尋健身教練來訓練阿美。一開始想講阿美會反抗，無想著阿美課上了即佻意著擎重。過後，阿美一下課毋係在健身房即係在去健身房个路上。

阿美進步真緊，擎个重量越來越重。雖然感覺真食力，毋過佢啞著自家个進步嘛感覺價值啊。有時練到歸膺身瘦軟疾，嘛真想討推懶；有時無細義著傷，嘛想討放煞。逐擺阿美討放煞遐下，即會想著有人講過：「危險係真實在个，毋過討驚佢抑毋，係愛你自家擇。」在訓練个過程內底，佢了解想討啞著山嶼恁靚个光景，定著無恁快。

一矚目，過了幾下年。這滿擎重對阿美來講即像敌氣恁自然，佢想討做一個擎重運動員，拗鍛鍊身體个觀念傳揚得較多人知。教練感覺得阿美參加比賽个時機到位啊，阿美無得大家失望，第一擺比賽即得獎。佢嘎無一兜仔自滿，因為阿美有較大个目標，遐即係參加奧運。

逐日訓練過後，教練攏會陪阿美共下啞優秀選手个影片，檢

查自家攏有哪位愛改進。阿美嘛陸陸續續參加比賽，漸漸个越來越多人熟事佢，外頭个人拗佢號一個偏名：「擎重仙女」。

經歷千辛萬苦，阿美總算得著代表臺灣參加奧運个機會，這係佢幾下年來个夢想，毋過時間佹佹，佢黏時愛投入訓練，愛提出頭好个表現替國家爭取光榮。

在恁多優秀人才个奧運場上，無半儕知阿美係麼儕，甚至猶有一兜仔啞輕這個第一擺來參賽个黃皮膚个妹子，毋過阿美知佢現時愛做个即係提出頭好个表現，毋使聽人講遐講這，正經強个人總係用成績來講事。跔比賽直直進行，就算阿美个分數跔人毋會著，佢猶係牙根咬个煞作拚，真緊即來到頭尾一關个挺直擎¹，教練和阿美思量過後按算盡命去拚，去試毋識擎過个重量，若係講成功啊，阿美可能會係這屆奧運个金牌得主。

落尾滿足無採，阿美失敗啊。佢顛倒毋會感覺見笑，因為佢知就算失敗啊，總比無試過正來後悔猶較甘願。阿美立誓四年過後討攏轉到奧運个比賽場，替臺灣爭一坵金牌。

¹ 挺直擎：音 ten^ˆ chid^ˆ kia^ˆ；挺舉。

111 年全國語文競賽客家語朗讀文章高中學生組（詔安腔）

編號 10 號

【炕窯】劉玉蕉原作

打早，即聽著阿媽交代阿依，去市場打一坵豬肉、買一尾薑魚轉來，「啊，怪奇！係麼儕做生日？」問過阿媽正知，係滿姑討轉外家，難怪阿媽恁歡喜！睺滿姑討轉來個時間，佢走去莊頭阿惜姨個雜貨店等，佢頭勾勾直頭睺。姑丈個車旨駛俚，佢即走出去攞手啊，姑丈車一擋恬佢即跋上車，滿姑即笑講：「屎肫旨坐燒，即愛落車啊，恁多時間！」知佢歡喜，佢尖入車底即和姑表姊妹大聲賞起來。

滿姑隨個等路足錫人，逐儕攞有一份，車後斗猶有一大布袋個番薯，阿媽講：「番薯恁多愛仰子好，無即提來炕窯好啊，屋背田底個泥，上禮拜正翻過，應當嘛燥啊，儂人來炕窯，好無？」「好哦！讚啦！」聽著有好賞，佢這兜人黏時即應好。

起窯啊！阿怙仔掇三坵大泥圖做門，窯身即尋像佢個拳頭嫵恁大粒泥圖來疊，疊高了後猶愛慢慢收俚來，加疊幾下粒，半站嘎崩落來，「唉，老刀嫵無利，無恁好趁食！」收尾猶愛麻煩姑丈鬥腳手，正順勢做好。窯正起好，阿哥即命令佢人，佢喊佢和姑表姊妹去撿樵，阿姊負責起火、架樵，大姊真靠會核，火顧到

猛猛猛，紅紅個火舌，對泥圖縫鑽出來，像討燒人共款，害佢人閃到遠遠遠，無幾久，泥圖即像甜柿紅激激！

「會用啊，樵毋好攞固落去，火愛退出來，即會用擊番薯落去！」阿媽按講。

火炭培開，番薯即一粒一粒擊入窯內底去。「哇！」表阿哥提樹棍一培落去，紅紅個泥圖措落來，堵好奔在番薯面上，「起窯難，打壞快」，細子人輪流培泥圖，逐個擺舞到一頭一面，落尾猶係姑丈來收尾，佢拗幼泥擊起去，用砂耙頓撈，面上攞插一支香，恁泥墩一兜仔煙都無出來，正喊佢人去寮。真無簡單拗窯疊好，這滿睺起來即像一個番薯壟！

藏膨嬰猶旨賞罇，遠遠即鼻著香香個味啊，睺著阿依在遐開窯，佢人緊緊俚過去睺佢變奇術，阿依驚番薯糝綿去，真細義在遐慢慢糝，款款糝，香氣錫佢人口涎溶溶汀，食肚嘛噉哩咕嚕直鳴。田脣上，佢人排排坐，香香個番薯塞歸嘴，天恁清，番薯恁香，在屋背個田底，佢人寮到烏昏正轉屋下。